

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINSKI SUD U VISOKOM
Broj: 41 0 K 108841 26 K
Visoko, 01.06.2026. godine

U IME FEDERACIJE BOSNE I HERCEGOVINE

Općinski sud u Visokom, sudija Hana Hajdo-Ferhatović, uz sudjelovanje zapisničara Šabanović Armina, u krivičnom predmetu protiv optuženog M.M. zbog krivičnog djela Nasilje u porodici iz člana 222. stav 1. Krivičnog zakona Federacije Bosne i Hercegovine, rješavajući po optužnici Kantonalnog tužilaštva-tužiteljstva Zeničko-Dobojskog kantona broj T04 0 KT 0064864 25 od 20.11.2025. godine, nakon održanog javnog i usmenog glavnog pretresa, u prisustvu Kantonalnog tužitelja Rahmanović Elvira, optuženog M.M. i njegovog izabranog branitelja Mirza Smailbegović advokat iz Breze, dana 29.05.2026. godine donio je i javno objavio, a potom dana 01.06.2026. godine izradio

PRESUDU

OPTUŽENI: M.M. , sin N. i majke K. rođene F., rođen ... godine u V., nastanjen na adresi T. ..., općina B., pismen, sa završenom srednjom školom, po zanimanju policajac, oženjen, otac troje djece, zaposlen u MUP PS, vojsku služio u Crnoj Gori, srednjeg imovnog stanja, Bošnjak, državljanin BiH, JMB: ..., neosuđivan,

Kriv je

Što je:

Dana 14.07.2025. godine, oko 22:00 sati, u B., nasiljem, drskim i bezobzirnim ponašanjem, na spratu kuće gdje živi sa svojom suprugom F.M. , na adresi T. ..., ugrozio mir, tjelesnu cjelovitost i psihičko zdravlje snahe M.M.2 , na način da je na istu vikao govoreći joj da je drogeraš, psujući joj majku, govoreći joj „pička ti materina“, da bi u jednom momentu istu pogodio metalnom tacnom u predjelu glave, tačnije čela, uslijed čega joj je krenula krv niz lice, iako je bio svjestan da ovakvim nasiljem, drskim i bezobzirnim ponašanjem ugrožava mir, tjelesnu cjelovitost i psihičko zdravlje člana svoje porodice sa kojim ne živi u zajedničkom domaćinstvu, a što je i htio, na koji način je ugrozio mir, tjelesnu cjelovitost i psihičko zdravlje člana svoje porodice snahe M.M.2 ,

Čime je počinio krivično djelo Nasilje u porodici iz člana 222. stav 1. Krivičnog zakona Federacije Bosne i Hercegovine.

Pa sud optuženom na osnovu istog zakonskog propisa, te na osnovu članova: 42., 49. i 62. Krivičnog zakona Federacije Bosne i Hercegovine, i z r i č e

USLOVNU OSUDU

Kojom se optuženom za počinjeno krivično djelo utvrđuje kazna zatvora u trajanju od 6/šest/ mjeseci, a koja se neće izvršiti ako optuženi za vrijeme od 1 /jedne/ godine, od dana pravosnažnosti presude, ne počini novo krivično djelo.

U skladu sa članom 78. KZ F BiH, od optuženog M.M. se trajno oduzima tabla prečnika 30 cm boje srebra koja je bila upotrijebljena prilikom počinjenja krivičnog djela, koja će se potom uništiti posredstvom PS Breza gdje se i nalazi.

Na osnovu člana 212. stav 4. Zakona o krivičnom postupku Federacije Bosne i Hercegovine, oštećena M.M.2 se sa imovinsko pravnim zahtjevom upućuje da isti ostvaruje u parničnom postupku.

Na osnovu člana 202. stav 1. u vezi sa članom 199. stav 2. tačka g) ZKP FBiH, optuženi su dužni platiti sudu na ime troškova krivičnog postupka u vidu paušala iznos od 50,00 KM, sve u roku od 30 dana, po pravosnažnosti presude pod prijetnjom izvršenja.

Obrazloženje

Kantonalno tužilaštvo-tužiteljstvo Zeničko-Dobojskog kantona (u daljem tekstu KT ZDK) optužnicom broj T04 0 KT 0064864 25 od 20.11.2025. godine optužilo je M.M. da je počinio krivično djelo Nasilje u porodici iz člana 222. stav 1. Krivičnog zakona Federacije Bosne i Hercegovine (u daljem tekstu KZ FBiH). Optužnica je potvrđena od strane sudije za prethodno saslušanje dana 02.12.2025.godine.

Na glavnom pretresu dana 26.05.2026. godine, prije izvođenja dokaza, optuženi M.M. priznao je krivnju za krivično djelo Nasilje u porodici iz člana 222. stav 1. KZ FBiH.

U uvodnom izaganju tužilac izjavi da je Kantonalno tužilaštvo ZDK dana 20.11.2025. godine podiglo optužnicu broj T04 0 KT 0064864 25 protiv optuženog M.M. zbog krivičnog djela Nasilje u porodici člana 22. stav 1 KZ BIH. Činjenične navode iz optužnice tužilaštvo će dokazivati predloženim materijalnim i subjektivnim dokazima a posebno ističem iskaz oštećene M.M.2, medicinskom dokumentacijom, odnosno nalazom JU Dom Zdravlja Breza od 14.07.2025. godine kao i sačinjenom fotodokumentacijom sa uviđaja.

U uvodnim riječima branilac optuženog najavi priznanje na glavnom pretresu, a optuženi izjavi: „Priznajem djelo u cijelosti, kajem se, molim sud da me što blaže kazni, jer isto je počinjeno iz razloga što moj sin i moja snaha vrše zloupotrebu narkotičkih sredstava, a kao činjenicu koja dokazuje tačnost mog navoda je i ta da i sad ovog momenta moj sin se nalazi u mojoj kući na izdržavanju kazne od godinu dana noseći nanognicu, naravno uz moje dopuštenje da bi kaznu služio u mojoj kući, naravno zbog učinjenog djela se kajem i oni su nakon bili napustili moju kuću, ali iz sažaljenja i na njihovu molbu sam dozvolio da se vrate i da žive na spratu porodične kuće gdje sam ujedno i potpisao odobrenje za izdržavanje kazne. Moj odnos sa snahom je uvijek bio odličan, međutim splet tih okolnosti, ona je bila stala u zaštitu mog sina, svog supruga, sad se i ona kaje i htjela je da bude prisutna, međutim pošto ću priznati krivicu složili smo se da nema potrebe, a i rodila je prije sedam dana. U nastavku molim sud da mi izrekne najblažu moguću

kaznu predviđenu za ovo djelo iz razloga što sa tim sinom i snahom imam i dvoje unučadi, a nisam siguran da neće završiti i u zatvoru pa neko bi trebao brinuti o njima, druga stvar za godinu dana idem u penziju pa da što kaže narod rahat odem u penziju.“

U završnim riječima tužilaštvo ističe da imajući u vidu činjenicu današnjeg priznanja krivice optuženog, kao i dokaze koji su uloženi u sudski spis, odnosno sadržaj dokaza, predlažu da sud optuženog oglasi krivim za krivično djelo koje mu se stavlja na teret te da mu izrekne adekvatnu vrstu i visinu krivično pravne sankcije, po ocjeni tužilaštva to je uvjetna osuda u što blažem obimu, a iz razloga što je optuženi priznao izvršenje krivičnog djela čime je doprinio efikasnosti i ekonomičnosti postupka, izrazi iskreno kajanje, neosuđivano je lice, motivi zbog kojih je učinio krivično djelo su ljudske i roditeljske prirode, a ne smije se izgubiti iz vida da se radi o dugogodišnjem PS službeniku koji uskoro odlazi u penziju. Mislim da su to sve olakšavajuće okolnosti koje tužilaštvo cijeni da postoje kod optuženog. Što se tiče statusa oštećene iako se ona izričito nije izjasnila predlažu da je sud ipak uputi na parnični postupak u cilju ostvarenje imovinsko pravnog zahtjeva, te da sud donese odluku o troškovima krivičnog postupka u vidu paušala po odluci suda i ukoliko sud smatra da je optuženog neophodno obavezat troškovima postupka. Mišljenja su da će se uvjetnom osudom ostvariti prije svega specijalna prevencija a samim tim i generalno odnosno svrha kažnjavanja.

Branilac u završnoj riječi izjavljuje da uzimajući u obzir današnje priznanje njegovog branjenika te okolnosti po kojima je djelo izvršeno djelo da je isti pokušao da spriječi konzumiranje narkotičkih sredstava od strane članova njegove bliže porodice, te činjenicu da isti nije bio osuđivan, da se radi o dugogodišnjem PS službeniku koji uskoro ispunjava uslove za penziju, porodičnom čovjeku, mole sud da istom izrekne uslovnu osudu, jer istom će se ostvariti kako specijalna tako i generalno prevencija. Također, ističe da su međusobni odnosi optuženog sa članovima njegove porodice poboljšani. Optuženi izjavi da se pridružuje navodima svog branioca.

Sud je cijenio priznanje optuženog u saglasnosti sa dokazima u koje je sud izvršio uvid i to: zapisnik o saslušanju svjedoka-oštećene M.M.2 PS Breza broj: 08-02-09/3-2-282/25 od 14.07.2025. godine, zapisnik o saslušanju svjedoka F.M. PS Breza broj: 08-02-09/3-2-283/25 od 15.07.2025. godine-odbila da svjedoči, standardizirani policijski izvještaj PS Breza broj: F-04-18-24/01058 od 14.07.2025. godine, zapisnik o uviđaju PS Breza broj: 08-02-09/3-2-90/25 od 14.07.2025. godine, nalaz i mišljenje ljekara specijaliste JU Dom zdravlja Breza HMP broj: 6237 od 14.07.2025. godine na ime M.M.2, naredbu PS Breza broj: 08-02-09/3-2-19/25 od 15.07.2025. godine, izvještaj/potvrda o tragovima i predmetima koji se dostavljaju u depozit PS Breza broj: 08-02-09/3-2-90/25 od 14.07.2025. godine, rješenje o izricanju zaštitnih mjera Općinskog suda u Visokom broj: 41 0 Pr 107266 25 Zm od 15.07.2025. godine prema M.M. u, fotodokumentaciju PS Breza broj: 08-02-09/3-2-90/25 od 14.07.2025. godine i izvod iz kaznene evidencije za osumnjičenog M.M. PS Vareš broj: 08-02-12/2-03-10-11-1268/25 od 28.07.2025. godine.

Odbrana nije imala dokaznih prijedloga niti je prigovarala izvedenim dokazima.

Sud je priznanje krivnje optuženog ocijenio kao jasno, iskreno i nedvosmisleno ničim uslovljeno tako da je priznanje optuženog u cijelosti potvrđeno sa iskazima oštećene M.M.2, a koji iskazi, kao i priznanje okrivljenog su u saglasnosti sa materijalnim dokazima, naprijed navedenim, u koje je sud izvršio uvid, naročito medicinskom dokumentacijom u odnosu na zadobivene povrede

kod M.M.2 konstatovane u nalazu i mišljenju ljekara specijaliste JU Dom zdravlja Breza HMP broj: 6237 od 14.07.2025. godine na ime M.M.2, te priloženom fotodokumentacijom, te izvještajima policijskih službenika o počinjenom djelu sa pratećom dokumentacijom standardizirani policijski izvještaj PS Breza broj: F-04-18-24/01058 od 14.07.2025. godine, zapisnik o uviđaju PS Breza broj: 08-02-09/3-2-90/25 od 14.07.2025. godine, a koji dokazi po svom vjerodostojnom značaju potvrđuju priznanje optuženog, na osnovu čega van svake sumnje proističe da je optuženi ostvario sva bitna obilježja bića krivičnog djela Nasilje u porodici iz člana 222. stav 1. KZ FBiH.

Po ocjeni suda optuženi je navedeno predmetno krivično djelo učinio direktnim umišljajem jer je bio svjestan svog djela i htio je njegovo izvršenje, a sud je utvrdio da je optuženi prilikom izvršenja krivičnog djela bio uračunljiv, jer predloženim dokazima nije dovedena u sumnju mogućnost optuženog da shvati značaj svog djela i da upravlja svojim postupcima u vrijeme izvršenja djela, te su se u njegovim radnjama stekla sva bitna obilježja bića krivičnog djela Nasilje u porodici iz člana 222. stav 1. KZ FBiH.

Odlučujući o vrsti sankcije za optuženog sud je od olakšavajućih okolnosti cijenio da je optuženi priznao izvršenje krivičnog djela u cijelosti i time doprinio rasvjetljavanju utvrđenog činjeničnog stanja, materijalne, porodične i zdravstvene prilike optuženog, da je oženjen, zaposlenik MUP-a PS, kojem je ostala još godina dana do penzije, da su mu sin i snaha narkomani, koji konzumiraju narkotička sredstva i žive u njegovoj kući, da je neosuđivan, dok otežavajućih okolnosti na strani optuženog sud nije našao, pa je sud optuženom za navedeno krivično djelo utvrdio kaznu zatvora u trajanju od 6 /šest/ mjeseci, sa vremenom provjeravanja od 1 /jedne/ godine, a sud cijeni da će se sa uvjetnom osudom, kako je to navedeno u izreci presude, ostvariti svrha kažnjavanja predviđena članom 42. KZ F BiH, te postići potpuna kako posebna tako i generalna prevencija.

U skladu sa članom 78. KZ F BiH, od optuženog M.M. se trajno oduzima tabla prečnika 30 cm boje srebra koja je bila upotrijebljena prilikom počinjenja krivičnog djela, koja će se potom uništiti posredstvom PS Breza gdje se i nalazi.

Na osnovu člana 212. stav 4. Zakona o krivičnom postupku Federacije Bosne i Hercegovine, oštećena M.M.2 se sa imovinsko pravnim zahtjevom upućuje da isti ostvaruje u parničnom postupku.

Na osnovu člana 202. stav 1. u vezi sa članom 199. stav 2. tačka g) ZKP FBiH, optuženi je obavezan da je dužan platiti sudu na ime troškova krivičnog postupka u vidu paušala iznos od 50,00 KM, sve u roku od 30 dana, po pravosnažnosti presude pod prijetnjom izvršenja obzirom da je isti pred sudom izjavio da je zaposlen a sudu nisu predloženi dokazi da bi plaćanjem navedenog iznosa troškova bilo dovedeno u pitanje izražavanje optuženog.

Sudija
Hana Hajdo-Ferhatović

PRAVNA POUKA:

Protiv ove presude dozvoljena je žalba Kantonalnom sudu Zenica u roku od 15 dana po prijemu iste, a žalba se podnosi ovom sudu u tri primjerka.